

Tschuncheismas ei in cass da cletg dalla Baselgia

Tgei fussen nus senza Tschuncheismas? Ina risposta aunc adina valeivla sin quella damonda, ha gia el secund tschentaner suenter Cristus, il pader dalla baselgia Athenagoras d'Athen dau. El scriva: «Senza il Sogn Spért ei Diu lontans, resta Cristus el vargau, lu ei igl evangeli in bustab miert, la Baselgia sulettamein in'uniun, l'autorità ina fuorma da pussonza, la missiun propaganda, la liturgia in'evocaziun dils spérts e la veta cristiana ina morala da sclavaria.»


Gest perquei ei Tschuncheismas per la Baselgia e per mintga singul cristian ina fortuna. Entras il Sogn Spért ei Diu datier a nus, e Cristus accumpogna nus dal present el futur.

En tgei consista lu atgnamein la fortuna da Tschuncheismas?

In maletg da varga melli onns dat ina risposta: Igl eveniment da Tschuncheismas ei creaus cun in rom verd ella fuorma d'in quaterfegl, in simbol per cletg. Ch'ils giuvnals basegnan quei Sogn Spért, ch'ei neccessaris per viver, semuossa ell'expressiun pauc ventireivla da lur fatschas. Els ein aunc – tenor indicaziuns dil scienzau litterar gedi, George Steiner – „affons dalla sonda“, ch'ei restai fixai denter venderdis-sogn e Pastgas.

Jeu creiel, ch'era nus essan beinsavens da quels „affons dalla sonda“, cu la cardientscha vid la levada da Jesus entscheiva a ballucar.

La fiasta da Tschuncheismas animescha da buca dubitar. Da Tschuncheismas succeda Pastgas en nos cors. Igl ei denton impurtont ch'il Sogn Spért seigi buca sco ina rarità d'in quaterfegl en nosa Baselgia. El siglienta il tscherchel entuorn



ils giuvnals. El tarmetta ils giuvnals – ed ozildi nus cristians – ora el mund, per viver leu nosa cardientscha e per plidar dad el.

Possi il Sogn Spért emplenir buca mo nos cresmands, mobein nus tuts danovamein cun il fiug da sia carezia; che nus possien viver, rinforzai ed encuraschai entras sia forza amabla.

A nos cresmands:

Neu tier nus pussent Sogn Spért. Dai grazias, forza e confiart. Viseta nus, Ti dun da Diu. Ti, che has nos cors scaffiu. Envida nos cors cun il fiug da tia carezia.

En nossas pleivs retscheivan ils suandonts scolars e las suandontas scolaras il sogn sacrament dalla Creisma:

A Laax:

Naomi Arpagaus, Nino Caduff, Gian-Luca Coray, Julia ed Anna Seelig, Alessia Caduff, Julian Cavigelli e Sergio Welter.

A Falera:

Toni Bearth, Nino Cajoche, Fabia Casutt, Sonja Macedo Pereira, Natalina Suter, Anna Bärtsch, Fabienne Cabalzar e Yannick Caduff.

Possi il Sogn Spért animar e rinforzar vies cor per vossa missiun sco cristifideivels. In grazius di da fiasta e forza per vies mintgadi el viver cun Diu e cun il concarstgaun. Sco cresmader beneventein nus il vicari general dr. Martin Grichting ed engraziein ad el per il survetsch a nos scolars.



Informaziuns per Laax

Communiun dils malsauns:

Mesjamna, ils 22-06-2011 suentermiezdi

Devoziun dallas mummas e lur affons

«Jesus ha bugen mei», tier quei tema ein tuttas mummas e lur affons envidai alla devoziun da mesjamna, ils 08 da zercladur allas 16.00h. Igl ei la davosa gada che *Martina Wolf* vegn a menar la devoziun. A Ti Martina engraziein da tut cor per Tiu engaschi exemplaric e giavischein a Ti tut il bien.

Invit al viadi dils seniors

Mesjamna, ils 15 da zercladur 2011 envida l'Uniun samaritana tuts seniors a lur viadi. Nus giavischein a vus tuts in legreivel di en buna cumpignia.

Fiasta dil s. Batten

Da Sontgilcrest, ils 23 da zercladur 2011 allas 12.00h retscheiva *Milena*, feglia da Manuel e Sabina Caduff-Camathias il sogn sacrament dil Batten. Nus giavischein a Milena bia sustegn e ventira ella cuminonza cristiana.

Gratulaziun per nozzas

Ils 25 da zercladur 2011 festiveschan *Marco Caviezel* e *Liliane Job* lur nozzas. Nus gratulein als nozzadurs e giavischein bien cletg, benedicziun, bia ventira ella veta matrimoniala ed ina fiasta sulegliva.

Lavar ora la baselgia: Mesjamna ils 29, allas 08.00 uras. Cordial Dieus paghi a tuttas dunnas che segidan.

Casa pervenda: Habitaziun da 2 ½ stanzas per locaziun

Da schar a tscheins sin 1. da settember 2011 (ni tenor convenientscha) ina habitaziun da 2 1/2 stanzas. Tscheins meinsil inclus cuosts accessoris e parcadi el liber, frs. 1'100.--. Vossa annunzia pren M. Bürkli, tel. 081/ 921 31 31, bugen encunter.

Informaziuns per Falera

Communiun dils malsauns:

Venderdis, ils 03-06-2011 suentermiezdi
Gievgia, ils 16-06-2011 suentermiezdi

Devoziun dallas mummas e lur affons

«Jesus ha bugen mei», tier quei tema ein tuttas mummas e lur affons envidai alla devoziun da mardis, ils 07 da zercladur allas 16.00 uras en baselgia.

Cordiala gratulaziun

Ils 19 da zercladur 2011 astga *Anita Egli-Luchsinger* festivar siu 90-avel natalezi. Nus gratulein alla giubilara e giavischein tut il bien, buna sanadad ed in ventireivel di da fiasta.

Fiasta dil s. Batten

Gliendisdis Tschuncheismas, ils 13 da zercladur 2011, allas 11.30h retscheiva *Anna*, feglia da Christian ed Irena Schütz-Winzap il s. sacrament dil Batten.

Sonda, ils 18 da zercladur 2011, allas 11.00h retscheiva *Joyce*, feglia da Roland Alig e Janine Bissig e

dumengia, ils 19 da zercladur 2011, allas 11.30h retscheiva *Matias Odin*, feagl da Daniel e Rita Perkmann-Cabrin il s. sacrament dil Batten.

Nus beneventein cordialmein *Anna*, *Joyce* e *Matias Odin* ella cuminonza da nossa baselgia. La benedicziun da Diu ed il sustegn dils concertants accumpogni els tras la veta.

Survetsch divin preeucaristic

Tier la fiasta da Sontgilcrest, dumengia ils 26 da zercladur ein ils affons dalla scoletta ed ils scolars dall' emprema e la secunda classa cordialmein envidai tier il survetsch divin preeucaristic.